



## Векало ПахIала галатахошка яздина кехат

Иийсан болу хаза кхаъ кхайкхо болийча, жуьгтий боцурш, кхечу къаьмнех болу нах а и тIеэца хIиттира. ТIаккха хаттар кхолладелира: товрат-хъехамаша бохург дан дезий стага, Иийсах билггала тешаш верг хилархъама? ПахIала гойту иза оьшуш ца хилар. Дала леррина Къобалвинчуьнца долчу дахаран бух а хилла дIахIоьттинарг тешар ду. Тешарехула массо а Далла хьалха бакъ ву. Рим-мехкан цхьа дакъа долчу Галатехь Иийсах тешачийн тобанашкахь бара ПахIална духьал болу нах. Цара дIакхайкхийра, Иийсах тешаш болчара товрат-хъехамаш а лара беа Далла хьалха бакъхилархъама.

Харцхъеамо лебина нах бакъдолчу тешарна а, билггала долчунна а тIеберзорхъама яздина ду *ПахIалан галатахошка долу кехат*. Цо боху, ша векал хилар Делера ду, адамийн муьлххачу а Iедалера дац, леррина кхечу къаьмнийн нахана юкъахь кхайкхам бан дезаш ву иза. Цул тIаьхьа цо тIечIагIдо адамаш тешарехула бен Далла хьалха бакъ ца хилар. Тептаран чулацамехь ПахIала гойту Иийсах тешачеран дахаран хьал Дала леррина Къобалвинчух долчу тешарх схаьболучу безамца доьзна хилар.

### *ПахIала маршалла доуьйту*

**1** <sup>1</sup>ХIара кехат яздо шуьга аса, векал волчу ПахIала. Цхьанна а тобано я цхьанна а адамехула къобалвина вац со. Векал а вина, со дIахьажийнарш бу Дала къобалвина волу Иийса а, Иза веллачуьра денвина волу вайн Да волу Дела а. <sup>2</sup>Аса а, соьца болчу массо а динан вежарша а маршалла доуьйту шуьга, Галата-махкарчу Иийсах тешначу нехан тобанашка. <sup>3</sup>Вайн Да волчу Делера а, вайн Веза Эла волчу Дала леррина къобалвинчу Иийсагара а долу дика а, машар а хуьлда шуна. <sup>4</sup>Вайн кьинош бахьана долуш Ша дIавелла Цо, вайн Да волчу Делан лаамца кху зуламечу заманах вай кIелхьардахархъама. <sup>5</sup>Сийлалла хуьлийла Цуьнан массо а заманахь. Амин.

### *Хаза кхаъ цхьаъ бен бац*

<sup>6</sup>Со цецвуьйлу шух! Дала леррина Къобалвинчун маьхза долу дика бахьана долуш Дала шу Шена тIе ма озийна! Ткъа шу, иштга сиха Цуьнгахьара

дIа а дирзина, кхечу хьехамна тIаьхьахИтта дохку. <sup>7</sup>Ткъа иза-м кхин тай-па хаза кхаь бац, амма цхьаболу нах бу шун дегнаш чу шеко а тосуш, шуна Дала леррина Къобалвинчо беана хаза кхаь харцахьабаккха лууш.

<sup>8</sup>Ткъа оха шуна беанчу хазачу кхоана метта я оха а, я стигаларчу малико а кхин кхаь бахьахь, Делан неIалт хуьлийла царна. <sup>9</sup>Айса хьалха ма-аллара, хIинца юха а боху ас: нагахь аша тIеэцна болчу кхоана дуьхьал цхьаммо кхин кхаь беанехь, Делан неIалт хуьлийла цунна тIехь.

<sup>10</sup>Ткъа хIинца нахана хьалха диканиг хилар лобху те ас я Далла хьалха дика хилар лобху те? Адамашна хьалха диканиг хилар лобхий те ас? Нагахь аса адамашна хьалха со дика хетар хIинца а лехахьара, Дала леррина Къобалвинчун гIуллакх деш верг хир вацара со.

### *Муха хилира ПахIалах векал?*

<sup>11</sup>Аса дIахоуьйту шуьга, динан вежарий, йижарий, ас шуна кхайкхийна хаза кхаь адамашкара боцийла. <sup>12</sup>ХIунда аьлча аса и хаза кхаь адамашкара тIеэцна а бацара, амма Дала леррина къобалвинчу Иийсас и кхаь суна бовзийтина хилар бахьана долуш, ас и кхаь тIеийцира. <sup>13</sup>Шуна хезна-кх сох лаьцна, хьалха бакъволу жуьгти хилла леллачу хенахь со муха вара. Шуна хаьа, мел кьиза тIаьхьаваьллера со Иийсах тешначийн Делан долахь йолчу тобанашна, уьш хIаллак а еш. <sup>14</sup>Сайн тайпанара болчу жуьгтийн нийсархошна юкьахь, сайн дайша лелийна Iадаташ лардар тIехь хьалхе йоккхуш стаг вара со. <sup>15</sup>Со дуьнненна тIе а валале, со къастийначу Дала, Ша суна динчу диканца, <sup>16</sup>суна хьалха Шен КIант дIахIоттийра, Цунах лаьцна болу хаза кхаь, жуьгтий боцучу, кхечу къаьмнех болчарна а кхайкхорхьама. Со ца вахара цхьанна а адамах дагавала а, <sup>17</sup>я Ярушалайм-гIала а ца вахара со, сол хьалха векалш хилла болчарна тIе. Амма со Iаьрби-махка а вахана, тIаккха Дамасакх-гIала юхавирзира. <sup>18</sup>Цул тIаьхьа, кхо шо даьлча, ШамIа-Кипа вовзархьама Ярушалайм-гIала вахара со. И волчоьх аса пхийтта де даьккхира. <sup>19</sup>Ткъа кхечу векалех, Везачу Элан ваша Якъуб воцург, цхьа а ца гира суна. <sup>20</sup>Ас шуьга яздийриг бакъ хиларх Дела теш ву. <sup>21</sup>ТIаккха Сири-махка а, Килик-махка а вахара со. <sup>22</sup>Ткъа Дала леррина Къобалвинчух тешаш болчу жуьгташна со юьх тIера ца вевзара. <sup>23</sup>Царна хезнера, наха олуш: «Хьалха вай хIаллакдан тIаьхьаваьлла волу стаг ша бухенца дIадаккха гIиртина долу дин хIинца кхайкхош лелаш ву», — аьлла. <sup>24</sup>ТIаккха суна тIера цара Далла хастамаш бора.

### *Вукху векалиа ПахIал тIелоцу*

**2** <sup>1</sup>Цул тIаьхьа дейтта шо даьлча, со юха а Бар-Наабаца, сайца Тита а вуьгуш, Ярушалайме вахара. <sup>2</sup>Со вахара, Дала, цига со ваха веза аьлла,

<sup>1:13</sup>Векалийн 8:3; 22:4, 5; 26:9-11. <sup>1:14</sup>Векалийн 22:3. <sup>1:15,16</sup>Векалийн 9:3-6; 22:6-10; 26:13-18. <sup>1:18</sup>Векалийн 9:26-30. <sup>2:1</sup>Векалийн 11:30; 15:2.

сайна сьхадиллина дела. ТIаккха айса кхечу къаьмнашна юкьахь кхайкхош болу хаза кхаь цигахь болчу динан вежаршна а бовзийтира аса. Амма аса иза, массо а халкъана юкьахь доцуш, шун керла векалш болчуха лелачарна юкьахь дIабовзийтира, айса хьалха дина а, хIинца до а гIуллакх эрна ца хилар хаархьама. <sup>3</sup>Ур-атталла соьца волу Тита а, грекахо воллушехь, сунтван ца дийзира. <sup>4</sup>Ткъа сунтварах лаьцна дийца дийзира тхан. ХIунда аьлча цхьаболу харцвежарий кьайлаха тхуна юкьабаьхкинера, Дала леррина къобалвинчу Иийсаца хиларна тхан йолчу паргIатоне а хьаьвсина, юха а тхох леш дархьама. <sup>5</sup>Оха цара бохург ца дира, хазачу кхоан тIехь долу бакъдерг шуьца хилийтархьама. <sup>6</sup>Ярушалаймера тешаш болчу наха лоруш болчара а (уьш хьалха муьлш хиллехь а, суна-м бен а дац, хIунда аьлча Далла хьалха массо а адам цхьаь а ду) сан хьехамна хIумма а тIе ца туьйхира. <sup>7</sup>Цара мелхо а чIагIдира, хаза кхаь кхечу къаьмнашна кхайкхор суна тIедиллина хилар, иза жуьгташна хьехар Кипина тIедилларе терра. <sup>8</sup>ХIунда аьлча Кипех жуьгтийн халкъана векал Винчо, сох а вина кхечу къаьмнашна векал. <sup>9</sup>Дала и Шен дика суна а деллий хийча, Иийсах тешаш болчу наха шайн гIюртораш лоруш болчу Якъуба а, Кипас а, Яхьбьас а соьга а, Бар-Наабе а доттагIаллин куьг кховдийра. Цара барт бира, уьш жуьгташна хаза кхаь кхайкхош баха беза, ткъа тхо иза кхечу къаьмнашна кхайкхош даха деза аьлла. <sup>10</sup>Деккъа цхьа дехар дира цара: мисканаш дагахь латтабар. Изза дан со а чIогIа гIертара.

### *ПахIала Кипа бехкевар*

<sup>11</sup>Ткъа Кипа Антиох-гIала веанчу хенахь, иза суна юьхь-дуьхьал волуш, со дуьхьалвелира цунна, и бехке волу дела. <sup>12</sup>ХIунда аьлча, Якъуб волчуьра цхьаболу нах сьхабахкале, Кипас яа хIума йоура кхечу къомах сунтбаза болчу нахаца цхьаьна. Ткъа Якъуб волчуьра и сунтбина болу нах баьхкича, царах ийзалуш, иза юьстахувуйлура. <sup>13</sup>Цуьнца цхьаьна кхиболу жуьгтий а буьйлабелира моттаргIанаш ян. Цундела ур-атталла Бар-Нааба а дIакхийтира моттаргIанаш лелочарех.

<sup>14</sup>Амма, уьш хазачу кхоан тIера бакъдолчуьнца нийсса лелаш ца хилар сайна гича, массарна хьалха аса Кипе элира: «Нагахь хьо, жуьгти воллушехь, жуьгтий санна а ца лелаш, кхечу къаьмнех берш санна лелча, ахьа муха гIертор бу уьш жуьгтийн Iадаташ тIе?»

<sup>15</sup>Вайшиь дуьнен чуволуш дуьйна а жуьгти ву. Шайна тIехь кьинош долчу къаьмнашна юкьа ца вогIу вайшиь. <sup>16</sup>Амма вайна хууш ду, Дала леррина къобалвинчу Иийсах тешаро бен цхьа а адам Далла хьалха бакъ ца дойла. Товрат-хьехамаш кхочушбарца цхьа а Далла хьалха бакъвийр вац. Иштта вайшиь Дала леррина къобалвинчу Иийсах тешнера, товрат-хьехамаш тIера гIуллакхаш кхочушдарца а доцуш, амма ваьш Дала леррина

<sup>2:6</sup>Карлабаьккхинарг 10:17. <sup>2:16</sup>Забур 142:2; Римхошка 3:20; Римхошка 3:22.

къобалвинчу Иийсах тешарца Далла хьалха бакъхилийтархьама. Хунда аьлча кху дуьненара цхьа а адам товрат-хьехамаш т'ера бакъахьара гуллакхаш кхочушдарца к'елхьардер дац. <sup>17</sup> Нагахь, Дала леррина Къобалвинчуьнца хиларна, Далла хьалха ваьш бакъдар лобххушехь вайшиь а къинош летораш санна лелча, Дала леррина Къобалвинарг вуй те вайга къилахь долу гуллакхаш дойтуш верг? Дера вац! <sup>18</sup> Хунда аьлча, цкъа х'аллакдинарг юха меттах'оттош хилча, аса товрат-хьехамашна дуьхьал а ваьлла, со зуламхо хилар гойту. <sup>19</sup> Товрат-хьехамаша со х'аллаквина, цундела со оцу хьехамашна гергахь велла ву, Делан дуьхьа в'ахархьама. Со а, Дала леррина Къобалвинчуьнца ж'арах д'атоьхча санна, велла. <sup>20</sup> Бакъдерг аьлча х'инца вехаш верг со вац, ткъа Дала леррина Къобалвинарг соьгахула вехаш ву. Со дилха долуш вехаш хиларан бахъана ду, со веза а везна, Ша сан дуьхьа д'авелла волчу Делан К'антах тешаш со вехаш хилар. <sup>21</sup> Сайна Дала маьхза делла дика д'а ца тотту ас. Хунда аьлча бакъвар товрат-хьехамаш кхочушдеш делахьара, Дала леррина Къобалвинарг валар эрна хир дара!»

*Товрат-хьехам а, тешар а*

**3** <sup>1</sup> Ва сонта галатахой! Хьан тилийна те шу? Аса хаза кхаь хьобхучу хенахь Дала леррина Къобалвинарг ж'арах д'атохаран сурт ма-х'уттура шун б'аьргашна дуьхьал! <sup>2</sup> Цхьа х'ума хаа лаьа суна шуьгара: товрат-хьехамашна т'ера гуллакхаш кхочушдарна делла те шуна Делан Са, я хаза кхаь а хезна, шу цунах тешарна делла те Иза? <sup>3</sup> Оццул сонта ду те шу, шаьш Делан Синца долийна дахар адаман шен ницкъах тешна чекхдакхал? <sup>4</sup> Аша мел хьегна баланаш эрна хилла те? Со тешна ву и дерриг а эрна хилла ца хиларх! <sup>5</sup> Шен Са а, шуна юкьахь дина Иаламаташ а, аша товрат-хьехамашна т'ера гуллакхаш кхочушдарна луш ду шуна Дала, Цуьнгара болу хаза кхаь а хезна, шу цунах тешарна а доцуш?!

<sup>6</sup> Делан Йозанаш т'ехь Ибрах'имах лаьцна аьлла ма ду: «Иза тийшира Делах, цундела Дала иза Шена хьалха бакъвина лерира». <sup>7</sup> Иштга хаалаш, билггала Ибрах'иман т'аьхьенах берш Делах тешарш бу. <sup>8</sup> Делан Йозанаша, хиндерг а дуьйцуш, кхечу къаьмнийн халкъаш а церан тешарехула Дала бакъдийриг хиларх лаьцна хаам бинера Ибрах'име: «Дуьнен чуьра массо а халкъаш а Дала хьобгахула декъалдийр ду», — аьлла. <sup>9</sup> Цундела тешаш берш Делах тешаш хиллачу Ибрах'имца а декъала хуьлу.

<sup>10</sup> Ткъа товрат-хьехамашна т'ера бакъахьара гуллакхаш кхочушдарца шаьш Далла хьалха бакъхила луурш не'алтана к'ел бу. Хунда аьлча яздина ду: «Товрат-хьехамашна т'ехь яздина долу дерриге а даим а кхочушдеш воцучу х'оранна а т'ехь не'алт ду», — аьлла. <sup>11</sup> Ткъа товрат-хьехамашна

<sup>3:6</sup> Доладалар 15:6; Римхошка 4:3. <sup>3:7</sup> Римхошка 4:16. <sup>3:8</sup> Доладалар 12:3. <sup>3:10</sup> Карлабаьккхинарг 27:26 (Грекийн). <sup>3:11</sup> Хьабикьукъа 2:4.

т'ера гуллакхаш кхочушдарца Далла хьалха цхьа а бакъвийр воцийла вайна хууш ду, хунда аьлча: «Дала бакъвинарг Цунах тешарца вехар ву». <sup>12</sup> Муса-пайхамаран товрат т'ехь долчу бакъахьарачу гуллакхийн цхьа а уьйр яц тешарца, цу т'ехь аьлла ду: «Товрат-хьехамаш кхочушбийриг цаьрца вехар ву».

<sup>13</sup> Дала леррина Къобалвинчо к'елхьардаьхна вай и товрат-хьехамаш кхочуш ца барна хуьлчу не'алтах, и не'алт Шена т'е а лаьцна. Хунда аьлча Делан Йозанаш т'ехь яздина ду: «Дечиг т'е д'атоьхначу х'оранна а т'ехь не'алт ду», — аьлла. <sup>14</sup> И дерриг а кхочушхилла, Дала Ибрах'име лур ду аьлла долу декъалалла, Дала леррина къобалвинчу Иийсагахула кхечу къаьмнашна а далийтархьама а, вайн Шех тешар бахъана долуш, вайна ч'аг'о еш, Ша лур ду аьлла Делан Са вайна далархьама а.

*Товрат хьехам а, Дала дина весет а*

<sup>15</sup> Динан вежарий, йижарий, аса вайн дахарехь долу цхьа масала далор ду шуна. Ур-аттала адамаша шайна юкьахь ч'аг'ибина болчу бартана цхьаммо а йиш яц х'умма а цунна я т'етоха, я иза бохо а. <sup>16</sup> Ткъа Дала, ч'аг'о еш, элира Ша Ибрах'имна а, цуьнан т'аьхьенах волчунна а лун дерг. Дацара и аьлла: «т'аьхьенах болчарна» бохург дуккханех лаьцна долуш санна, амма цхьаннах лаьцна долуш санна аьллера, «хьан т'аьхьенах волчунна» аьлла. Иза ву Дала леррина Къобалвинарг. <sup>17</sup> Ас бохург х'ара ду: диь б'е ткъе итт шо даьлча а, Дала беллачу товрат-хьехамаша Дала Ша кхул хьалха бина болу барт бохо йиш яц. Цундела Ша лур ду аьлла йина ч'аг'о д'а а ца яккхира Дала. <sup>18</sup> Нагахь Дала Ша лур ду аьлларг товрат-хьехамаш кхочушбарна луш делахьара, иза Ша ч'аг'о ярна луш хир дацара. Ткъа Ибрах'имна Дала Ша лур ду аьлларг, Шен дикалле хьаьжжина, ч'аг'о ярна делла.

<sup>19</sup> Т'аккха стенна оьшу те товрат-хьехамаш? Уьш т'етоьхна бара адамашна шаьш летош долу къинош гайтархьама. Иза хир дара Ибрах'иман т'аьхьенах верг ваийтталц. Ткъа цу т'аьхьенах волчунна Дала ч'аг'о йинера, Ша декъалалла лур ду аьлла. Товрат-хьехамаш адамашна юкъа маликашкахула байитина юкъярло лелошволчун г'юьнца. <sup>20</sup> Ша цхьаь волчунна юкъярло лелошверг ца оьшу. Ткъа Дела цхьаь ву!

*Товрат-хьехамийн Илашо*

<sup>21</sup> Т'аккха товрат-хьехамаша Дала йинчу ч'аг'ионашна дуьхьало йой те? Йойла а дац! Хунда аьлча, нагахь адамашна деллачу товрато Дела волчохь хедар доцу дахар луш делахьара, къинойх бехказадовлар товрат-хьехамаш ма-бохху кхочушбарца доьзна хир дара. <sup>22</sup> Амма Делан Йозанаша

<sup>3:12</sup> Иаматьяр 18:5. <sup>3:13</sup> Карлабаьккхинарг 21:23. <sup>3:16</sup> Доладалар 12:7. <sup>3:17</sup> Арадаккхар 12:40. <sup>3:18</sup> Римхошка 4:14.

боху массо адамаш кѣинойн олаллехъ ду. Делан Йозанийн Іалашо яра Дала чІагІо еш лур ду аьларг Іийсах тешачарна дала, церан тешар бахъана долуш. <sup>23</sup>Ткъа и тешаран зама тІекхачале, вай оцу товрат-хъехамийн олаллехъ дара, Далла хила лиъна долу и тешар довзийтгалц. <sup>24</sup>Иштта Дала леррина Къобалвинарг схъаваллалц, вайна тІе хІоттийна волу тІехъожург санна, дара товрат, тІаккха Цунах тешар бахъана долуш Далла хьалха вай бакъдархъама. <sup>25</sup>Ткъа хІинца, и тешар деана дІахІоьттинчу хенахъ дубйна, вай товрат-хъехамийн олаллехъ дац кхин.

*Леш а доцуш, кІентий ду вай*

<sup>26</sup>Дала леррина къобалвинчу Іийсах тешарца шу массо а Делан кІентий ду. <sup>27</sup>ХІинца Дала леррина Къобалвинчун дола а довлуш, шаьш хих чекхдахийтина дела, Іийсан бедарш тІеюьйхича санна, Цуьнан васт схъаэчна аша. <sup>28</sup>Бац шуна юкъахъ я жуьгтий а, я кхечу къомах долу адамаш а, я лай а вац, я паргІатниг а вац, я божарий а, я зударий а дац шу – шу массо а Дала леррина Къобалвинчуьнца цхъаьна цхъаь ду. <sup>29</sup>Нагахъ шу Дала леррина Къобалвинчун делахъ, тІаккха шу ИбрахІиман тІаьхъенахъ ду. Цундела шуна а кхочур ду, Дала, чІагІо еш, лур ду аьларг.

**4** <sup>1</sup>Амма аса боху шуьга: тІаьхъенахъ дакъа кхочун долу кІант пхийттара валале йолчу хенахъ, ша массо а хьолан да воллушехъ, цхъана а хІуманна тІехъ лех къаста ца ло. <sup>2</sup>Цу берана тІехъ олалла а деш, цуьнан дола а деш, тІехъожуш хІоттийна ялхо хуьлу, цуьнан дас билгалъяьккхина хан тІекхачалц. <sup>3</sup>Иштта вай а дара, ваьш бераш долчу хенахъ, кху дуьненахъ долчу парзийн а, Іадатийн а долахъ. <sup>4</sup>Ша билгалъяьккхина зама тІекхаьча, Дала ваийтира зудчо дуьнен тІе ваьккхина волу Шен КІант. Иза а вара товрат-хъехамийн долахъ, <sup>5</sup>цу хъехамийн долахъ берш паргІат а баьхна, вайх а Делан бераш дархъама.

<sup>6</sup>Ткъа хІинца шу Делан бераш хилар гойтуш, Дала Шен КІентан Са даийтина шун дегнаш чу, массо а Іийсах тешаш болчеран санна. Цу Сино Деле кхойкху: «Дада, Сан Да!» – бохуш. <sup>7</sup>Цундела хьо хІинца, лай а воцуш, Делан кІант ву. Ткъа хьох, кІант хилча, хьо Делехула Цуьнан тІаьхъенахъ а ву.

*ПахІал галатахой бахъанехъ гІайгІане ву*

<sup>8</sup>ХІетахъ, Дела шайна ца вевза дела, шу баккъалла а деланаш боцучеран долахъ дара. <sup>9</sup>Ткъа хІинца, шайна Дела вевзича, цул сов Далла шу а девзича, юха а цхъа а ницкъ боцучу, ледарчу парзашна а, Іадаташна а тІе а дирзина, юха а церан леш хила лаьа те шуна? <sup>10</sup>Цхъацца денош а, беттанаш а, заманаш а, шераш а лардо аша! <sup>11</sup>Кхобру со, аса шуьца мел хьегна къа эрна хиларна.

<sup>3:29</sup> Римхошка 4:13. <sup>4:5-7</sup> Римхошка 8:15-17.

<sup>12</sup>Хилийша, вежарий, со санна! ХІунда аьлча со а ма хилира, шу санна. Аша хьалха-м цкъа а цхъа а вониг ма ца дира суна. <sup>13-14</sup>Шуна хаьа, со дубхъхъара шуна хаза кхаь кхайкхош веана волуш, со сайн дегІаца цамгар йолуш варий. Сох дог дала меттиг яьлла йоллушехъ, шу ца даьшна дІа ца дирзира сох, амма аша со, Делан малик я Дала леррина къобалвина Іийса волуш санна, тІеийцира. <sup>15</sup>Ткъа хІинца стенга дахана шун хазахетар? Со тешна ву, хІетахъ, шайн йиш хиллехъ, шайн бІаьргаш схъа а даьхна, уш суна дала а шу кийча хилла хиларх. <sup>16</sup>Ткъа хІинца, аса шуьга бакъдерг дийчица, сох шун мостагІа хилла?

<sup>17</sup>Суна хаьа и шаьш хаза кхаь бахъа болчухъа леларш шуна верасалла дан гІертий. Уьш шу шайгахъа даха лууш бу. Амма цара шу дикане далор дац. Царна, шу тхох дІа а къастийна, шун озабезам шайгахъа хила лаьа. <sup>18</sup>Гуттар а озабезамехъ хилар дика ду, со шуьца волччу хенахъ бен хилла а ца Іаш. <sup>19</sup>Сан бераш! Бер дуьненна чу долуш ненан хуьлу лазарш санна, сан юха а хуьлу-кх и лазам шу бахъанехъ. Иза иштта хир а ду, Дала леррина Къобалвинчун вастехъ шу хиллалц. <sup>20</sup>Лаьар-кха суна, хІинца шу долччохъ а волуш, кхечу озаца шуьца дийца, хІунда аьлча со инзар а вуьйлу шух, со кхеташ а вац-кх шух.

*Кхин сурт хІоттор: ХІажар а, Сарат а*

<sup>21</sup>Алийша соьга, товрат-хъехамийн долахъ хила лууш дерш, аша ла ца дугІу те цу тІехъ долчуьнга? <sup>22</sup>Цу тІехъ яздина ма-ду, ИбрахІиман ши кІант хилла аьлла. Цхъаь гІарбаш йолчу ХІажара винарг ву, важа паргІат йолчу ИбрахІиман зудчо винарг ву. <sup>23</sup>ГІарбаш йолчо винарг массо бераш ма-хиллара вина ву. Ткъа ша паргІат йолчо винарг Дала чІагІо еш аьллачуьнца вина ву. <sup>24</sup>Иза шен кхин маьІна долуш дустар ду. И ши зуда Дала бина ши барт санна хуьлу. Цхъаь Синай олучу лам тІехъ бина барт бу. Цу бартаца леш беш хиларна, иза лай вина йолу ХІажар санна хуьлу. <sup>25</sup>Ткъа Іаьрби-махкахъ болу Синай-лам «ХІажарца» боьзна бу. Иза хІинца а лаьтгахъ йолуш йолу Ярушалайм санна лору. ХІунда аьлча Ярушалайм а, Цуьнан бераш санна лоруш болу бахархой а лоллехъ бу. <sup>26</sup>Ткъа вайн нана санна лоруш йолу стигалшкара Ярушалайм паргІат ю. <sup>27</sup>Яздина ма-ду:

«Хазахета хъайна, бер ца хуьлуш ерг,  
цкъа а бер хилла а йоцург!

Хазахетарца йоккхае, бер хуьлуш лазарша ца хьийзийнарг,  
хІунда аьлча йитинчун бераш сов ду,  
майра волуш йолчун чу!».

<sup>28</sup>Ткъа шу, динан вежарий, Исхьакх а санна, Делан чІагІонца хилла бераш ду. <sup>29</sup>ХІетахъ стеган лаамца дуьнен чу ваьллачо Делан Са бахъана

<sup>4:22</sup> Доладалар 16:15; Доладалар 21:2. <sup>4:27</sup> ЕшаІ-ЯхІу 54:1. <sup>4:29</sup> Доладалар 21:9.

долуш ваьлларг эьккош хилла. Иза хИнца а ду иштта. <sup>30</sup>Ткъа хИун боху Делан Йозанаша? «Диаэькхае гIарбаш шен кIантаца, хИунда аьлча гIарбашо винчу кIанта паргIат йолчо винчу кIантаца тIаьхьадисинарг цхьатерра доькъур дац». <sup>31</sup>Цундела, динан вежарий, вай гIарбашан бераш а доцуш, паргIат йолчун бераш ду.

*ПаргIато ларъяр*

**5** <sup>1</sup>Дала леррина Къобалвинчо вай паргIатонехь дахийтархьама елира вайна паргIато. Цундела чIагIлой Iе шайн паргIатонехь, шаьш цхьаьнгге а юха а лолла ца лацийта.

<sup>2</sup>Аса, ПахIала, боху шуьга: нагахь аша шаьш сунтдайтахь а, Дала леррина Къобалвинчуьнгахара цхьа а пайда хир бац шуна. <sup>3</sup>Аса кхин а цхьа тоьшалла до хIора ша сунтвойтуш волчуьнга, цо товрат-хьехамаш тIера дерриге а гIуллакхаш кхочушдан деза аьлла. <sup>4</sup>И хьехамаш кхочушбарца Далла хьалха бакъдар ду моьттуш долу шу, Дала леррина Къобалвинчух дIа а къаьстина, Дала луш долчу диканах девлла. <sup>5</sup>Ткъа тхо сатуьйсусуш ду тхешан тешарехула Далла хьалха тхаьш бакъдаре. Тхо цунах тешна а ду, Цуьнан Сино тхайна чохь дийриг бахьана долуш. <sup>6</sup>ХИунда аьлча Дала леррина къобалвинчу Иийсаца тхо хИнца цхьаь хиларна, цхьа а маьIна дац я сунтваран а, я сунт ца варан а. Далла хьалха маьIна долу хИума цхьаь ду: безаман гIуллакхаш хуьлуйту тешар хилар.

<sup>7</sup>Шу хаза догIуш дара. Ткъа хьан йира те шуна бакъдолчунна тIаьхьа-хИитта новкъарло? <sup>8</sup>Шу бакъдолчунна тIера дIадохуш болу кхетам шуьга Шена тIекхойкхучу Делера бац. <sup>9</sup>«КIеззигчу муьстачу бедо берриг а бод совсабо». <sup>10</sup>Далла хьалха со тешна ву аша шайн кхетам хуьйцург ца хиларх, ткъа шун дегнаш чу шеко тосуш волчунна кхел хир ю, милла а иза велахь а.

<sup>11</sup>Ткъа, динан вежарий, нагахь аса хИнца а сунтварах лаьцна кхайкхамаш беш белажьара, со хьийзо тIаьхьабевр барий суна? Иза иштта делахьара, сан жIарах лаьцна болчу хьехамаша цхьанна а вас йийр яцара! <sup>12</sup>Шу гIалатдохуш берш, шаьш сунтбина а ца Iаш, баьIна а хилахьара!

*Делан Синца дахар*

<sup>13</sup>Ткъа шу, динан вежарий, Дала паргIатоне кхайкхина ду. Амма ма битийша меттиг и паргIато зуламна хилийта, шайн хьарам лаамаш кхочушбарца. Дейша гIуллакхаш вовшашка безам болуш. <sup>14</sup>ХИунда аьлча товрат-хьехамийн дуьззина долу маьIна хIокху дешнаш чохь ду: «Хьайна уллораниг, хьо санна, веза». <sup>15</sup>Амма, нагахь аша вовшашца кьийсамаш а беш, шу вовшийн даа дуйлалахь, хьовсалаш, баккъалла а шаьш а хIаллак ца хилийта!

<sup>4:30</sup>Доладалар 21:10. <sup>5:9</sup>1 Коринтхошка 5:6. <sup>5:14</sup>Иамальяр 19:18.

<sup>16</sup>Цундела боху ас шуьга, Делан Сино шаьш лела ма-дарра лела, тIаккха шайн хьарам лаамаш кхочушбийр бац аша. <sup>17</sup>Вайн хьарам лаамашна гуттара а лаьа Делан Синан лаамана дуьхьал дерг дан. Уьш гуттара а вовшашна дуьхьал хуьлу, шуьга шайна луург ца дайтархьама. <sup>18</sup>Ткъа Делан Сино шу лелош делахь, шу товрат-хьехамийн долахь дац.

<sup>19</sup>Вайн хьарам лаамаш вайна бевзаш бу. Уьш бу: нахаца лелар, боьха лаамаш хилар, кьилахь долу хИума дар, <sup>20</sup>цIушна<sup>1</sup> корта беттар, бозбунчалла леладар, мостагIалла хилар, девнаш дахар, эмгаралла лелор, оьгIазьэхар, дагазаллаш хилар, барт ца хилар, декъадалар, <sup>21</sup>цабезам хилар, малар тIехдаккхар, лар тIера валар, иштта кхидолу а ца оьшу хИуманаш дар. Цунах лаьцна, айса хьалха а ма-аллара, хИнца а боху аса шуьга, и гIуллакхаш деш берш Делан Олалле кхочур бац.

<sup>22</sup>Ткъа Делан Сино кхуллуш дерг хIара ду: безам, хазахетар, деган машар, доккха собар, вовшашца безамехь хилар, дикалла, тешаме хилар, <sup>23</sup>эсала хилар, чуьра ца валар. Ишттачу леларна дуьхьал цхьана а бакъонаша а вониг дойла дац. <sup>24</sup>Амма шаьш Дала леррина къобалвинчу Иийсан болчара шайн хьарам лаамаш, шайн боьхачу ойланашца, жIарах дIатоьхна.

<sup>25</sup>Вайн дахар Делан Синца хилча, тIаккха Делан Сино ма-бохху лела вай. <sup>26</sup>Ца дер вай дозаллаш. Ца хир вай вовшашна оьгIазьоьхуш а, вовшашка хьагI йолуш а.

**6** <sup>1</sup>Динан вежарий! Нагахь шух цхьаь ларамаза кьино лаьцнехь, аша, Делан Сино лелош долчара, шайн эсалчу амалца нисве иштаниг, амма, хьовсалаш, шаьш кьиношка ца зейта. <sup>2</sup>Дала леррина Къобалвинчо тIедиллинарг кхочушдархьама, дахаран мохь базбелча, вовшашна гIо де. <sup>3</sup>Нагахь цхьаннан, ша баккъалла а волчул, ша-шех лакхара ойла елахь, цо ша-шен Iежаво. <sup>4</sup>ХIораммо а дечу гIуллакхашца ша-шен зе, тIаккха цуьнан дозалла дан а йиш хир ю, ша кхечаьрца а ца вустуш. <sup>5</sup>ХIора адамна а Дала шен-шен дахаран мохь белла. <sup>6</sup>Ткъа Делан дош тIеоьцуш волчо шен долуш дерг кховдаде и дош хьоьхуш волчуьнга.

<sup>7</sup>Шу Iежа ма лолаш! Дела-м Iежалур вац, хИунда аьлча адамо ша дIадийнарг хьокхур а ду. <sup>8</sup>Шен хьарам лаам кхочушбеш, кьилахь долу хИу тосучо хIаллакхиларан ялта хьокхур ду. Ткъа Делан Синан лаам кхочушбеш хИу тосучо, Делан Сино луш долчу, хедар доцучу дахаран ялта хьокхур ду. <sup>9</sup>Дика дан кIад ма лолаш. Нагахь вай дика дан мало ца яхь, тIейогIур ю и хан, ваьш динчу гIуллакхийн кхиамаш вайна карош. <sup>10</sup>Вайн дан таро йолччуьра, дер вай вежаршна дика, къаьсттина вешан динан вежаршна.

<sup>5:17</sup>Римхошка 7:15-23.

*ЖамI дар*

<sup>11</sup> Гой шуна мел даккхийчу элпашца яздо ас шуьга сайн куьйгаца?!  
<sup>12</sup> Шу сунтдан тIетеЮш берш шайх тамаш байта лууш бу. Царна ца лаба Дала леррина Къобалвинарг жIарах дIатохар бахъана долуш шаьш хьий-задайтa. <sup>13</sup> Ткъа и сунтбинарш шаьш а бац шайн дахарехъ товрат-хъехамаш кхочушбеш бехаш. Ткъа царна лаба шу сунтдан, тIаккха и бахъана долуш дозаллаш дархъама. <sup>14</sup> Суна-м ца лаба цхъана а хIуманна тIехъ дозалла дан, вайн Везачу Элан, Дала леррина къобалвинчу Иийсан, жIарах дIатохаран тIехъ бен! И жIара бахъана долуш хIара дуьне суна дIадаьллера, ткъа со а кху дуьненна дIаваьллера. <sup>15</sup> Я сунтвар а, я сунт ца вар а хIумма а доцу хIума ду, хьох юакахьоьлинарг хилар воцург! <sup>16</sup> И дешнаш кхочушдеш долчу массарна а, Делан долчу Исраилан халкъана а Делан къинхетам а, машар а хуьлийла.

<sup>17</sup> ТIаьхъара а: цхъаммо а бала ма бойла суна, хIунда аьлча Иийсан чевнаш аса сайн дегIаца лелош ю.

<sup>18</sup> Вайн Везачу Эло, Дала леррина къобалвинчу Иийсас, дина маьхза долу дика хуьлийла шун синошца, сан вежарий.

Амин.